

To'on yó'o kían nì taa Santiago nì sa'an noó nà kúú kuendá Jesús

Ká'an Santiago ndisá'an

1 ¹ Yu'u kúú Santiago, ta kéchóoin noo Ndios xí'ín noo Jesucristo, nà kúú sato'o yo. Ta táai tuti yó'o kosaaan noo ndo'ó, nà kúú ndin uxí uu tu'u nà ñoo Israel, ndo'ó nà nì xita noo kua'an ndéi iin ní ñayuu. Ta ká'in ndisá'an xí'ín ndó.

Ná kadii iní tein tandó'ó ndó'o yó

² Ñani mií, kadii nda'o ini ndo tá ñó'o ndó tein ndi ndáa mií tandó'ó. ³ Chì sà ná'a va'a ndó ña tá ndó'o ndó tandó'ó sa'a ña kándéé iní ndo Jesús, dión dá kati'a ndó koo ndeé iní ndo noó tandó'ó. ⁴ Tá naki'o ndó mií ndó kì'o ndeé iní ndo noo ndi ndáa tandó'ó ndo'o ndó, dá xinkoo ndó tát'on kì'o kánian koo ndó, ta chichi ndó xí'ín ña kándéé iní ndo Jesús, ta ni iin tó'on ta'on ña'a o kámani noo ndo.

Kì'o Ndios ñaxintóni noo yo tá ná kaka yóan noo ná

⁵ Tá ió iin káa ndo'ó kámani ñaxintóni, dá kían kaka ndoán noo Ndios, dá chì ió nduu nà ña kían kì'o na ña xíka ndo, chì kúú ná iin Ndios xí'o kua'a ña'a noó ñayuu nà, ta kò kaá nà ña kòó. ⁶ Tído kaka ndoán xí'ín ña kándéé iní ndo ná. Ta o sa nákani kuáchi ini ndo, dá chì tá kée ndó dión, dá kían kúú ndó tát'on noó taño'o, ña kua'an xoo yó'o xoo káa kée tachì. ⁷ Ta iin ñayuu kée dión ná o sa kándati na natiin na ni iin ña'a xíka nà noo sato'o yo Ndios, ⁸ dá chì kúú ná iin ñayuu nákani uu ini, ta kò kúú ta'on na iin ñayuu iin tó'on ñaxintóni.

⁹ Ta ñani yo, nà kúnda'í, kánian kadii ini nà chì chindaya'i ñaá Ndios. ¹⁰ Ta nà kúú nà kuiká, kánian kadii ini nà sa'a ña nì kenóo ñaá Ndios, dá chì ña kuiká ió noo ná kúúán tát'on ita yuku, chì tóó vá ndato sáan, ta dión ta'ani ndo'o ña kuiká kómí ná. ¹¹ Dá chì tá xíno ndiandii, ta ndúdeen ká'anián, ta kúú íchì vá yuku ñoó, ta kúú kuéi va itaan, ta kúú ndáño'ó vá ña luu ndáaan. Dión ta'ani ndo'o nà kuiká xí'ín ña'a kómí ná nani ndúkú ná cháá kà ña kuiká.

Yá'a yó kée yó kuáchi kée ña kini ñó'o ini ñaxintóni yo

¹² Ndiká'an ndi kúú ví ñayuu, nà xí'o ndeé ini tá ndó'o na tandó'ó, dá chì tá nì xí'o ndeé iní nà noo ndidaá tandó'ó, dá kían natiin na ña kataki chíhí ná noo ió Ndios. Dá chì kì'o dión nì xí'o Ndios to'on na ña kían kee na xí'ín ñayuu kóni ñaá. ¹³ Tá kasá'a katoó ndo kee ndó iin kuáchi, o sa ká'an ndo ña Ndios kúú nà dáka'an ñaá, dá chì o kándéé ta'on ña kini ña kían ya'a Ndios kee na kuáchi, ta kò dáka'an Ndios ni iin tó'on ñayuu

ñā kīan ya'a na kee na kuachi. ¹⁴ Ñā kini ñó'o ñaxintóni yo, ñoó vá kīan dáka'an yo, dá yá'a yó kée yó kuachi noo Ndios, ta ñoó ta'ani kīan dákátoó ñāá. ¹⁵ Ta sa'á ñā kátoó yo kée yó ñā kini ñó'o ini ñaxintóni yo, sa'á ñoó kásá'á yá'a yó kée yó kuachi. Tá náki'o yó mií yó kaño'o yó tixi ndá'a kuachi, ñoó kīan kedaá xí'in yó, dá ni'i yo ñā kuu yo.

¹⁶ Sa'á ñoó, ná dá'a ni danda'í ndo mií ndó, ñani maní mií. ¹⁷ Dá chi ndidaá ñā va'a, xí'in ndidaá ñā ndaa kúú ñā xí'o oon Ndios noo yo vei nda induú. Ta mií Ndios kúú ñā ni kava'a ndidaá kúú ñā tóon ñó'o induú. Ta ni iin kuu ta'ón o nádaon Ndios, táto'on k'i'o nádaon ñā tóon ñó'o káa. ¹⁸ Ta mií Ndios ni chikaa ini ñā kīan ndee na yó de'e mií ná ni kee to'on ndaa ñā. Ta k'i'o dión ni kasandaá yo kúú yó ñā mií noó ni ñakana Ndios kakuu de'e na.

Ná kueídó'o yó choon sa'ándá Ndios, dá kīan koni yo kandeí va'a yó

¹⁹ Sa'á ñoó, ñani maní mií, kaon koo ndó kueídó'o va'a ndó noo ká'an dao ka ñayuu. Ná dá'a ni yachi téi ka'an ndo, ta ni o sa kuído yachi téi ini ndo. ²⁰ Dá chi ñā xído ini yo ko chíndeéan yó, dá kee yó ñā kóni Ndios. ²¹ Sa'á ñoó dánkoo ndó ndidaá kúú ñā kini kée ndó, xí'in ñā kini nákaní ini ndo, ta natiin ndó to'on Ndios, tá'an ñā ni seídó'o ndó, xí'in ñā nda'í ió ini ndo. Dá chi ñā yó'o kīan kándéé dákaki nio ndo.

²² Koo ini ndo kee ndó táto'on k'i'o ká'an to'on va'a ni seídó'o ndó. O sa kueídó'o oon ndoan, dá chi tá seídó'o oon ndoan, dá kīan danda'í ndo mií vá ndó. ²³ Chi ñā seídó'o oon to'on va'a Ndios, ta ko kée na ñā, noón kúú táto'on iin ñā ndé'é mií noo espejo. ²⁴ Dá chi tá ni ndi'i ni sa nde'é rá to'on káa ra, ta kúú kua'an ra. Ta kúú tóó vá, kúú sa nandodó va ra táto'on k'i'o káa ra. ²⁵ Tído ñā ndino'o ini seídó'o to'on ndaa Ndios, tá'an ñā taó xóo ñāá tixi ndá'a kuachi, ta ndíko toon naan, noón kúú ñā ko nándodó ñā ni seídó'o na. Di'a kée na choon sa'ándáan. Ñā yó'o kúú ñā chíndeé Ndios noo ndidaá ñā kée na.

²⁶ Ta ndidaá ñā ká'an ndíta ndaa xí'in Ndios, ta ko kándéé ná chituu na yú'u ná, noón kúú ñā danda'í mií, ta ni ñā kándísa na ko ndáya'i. ²⁷ Dá chi ñā ndaa, ñā vii kúú ñā kándísa yó noo tatá Ndios tá ná chindeé yó takuáli koó tatá xí'in naná, xí'in ñā kuáan tein tandó'ó ndó'o na, ta ná kandaa yo mií yó noó ñā kini ió ñayuu yó'o.

Ná dá'a ni chindaya'i yó dao ñayuu, ta kenóo yó dao ka ñā

2 ¹ Ñani mií, ndo'ó ñā kándéé iní sato'o yo Jesucristo, ñā kánian natiin ndidaá kúú ñañó'ó, o sa kóo ini ndo chindaya'i ndó dao ñayuu, ta kenóo ndó dao ka ñā. ² Ná keeá kuendá ñā ni saa iin ñā kuiká noo ndéi ndó dákuá'a ndó, ta ñó'o dé'e oro ndá'a rá, ta táyíi ndíxi ra. Ta mií hora daá ñā sa ta'ani iin ñā kúnda'í, ta ndíxi ra dá'on yatá. ³ Ta nátiin va'a ndó ñā ndíxi dá'on va'a ñoó, ta kaá ndo xí'in rá: “Kakoo ní noo téi va'a yó'o.” Ta kaá ndo xí'in ñā kúnda'í ñoó: “Xaan ní kuiión, o

kakoo noñó'ō xaḥn kooón.”⁴ ¿Á kō ná'á ta'on ndó ña sa'á ña kée ndó dión, sa'á ñoó káxi ndó ñayuu, ta keyíko ndo sa'a ná xí'ín ñaxintóni kini kómí ndó?

⁵ Sa'á ñoó, ñani maní miíi, kueídó'o va'a ndó ña yó'o. ¿Á kō ná'á ta'on ndó ña mií vá Ndios nī kaxi ñayuu kúnda'í ndéi ñayuú yó'o ña kían koo kuíká ná xí'ín ña kándéé iní ñaá ná, dá natiin na ta'i ná noo ió Ndios dándáki na, dá chí mií Ndios nī kaa ña kī'o na ña noó ñayuu kú'u ini na sa'a ná? ⁶ Tído ndo'ó, di'a kénóo va ndó ña kúnda'í. ¿Á kō ná'á ta'on ndó ña ta kuíká kúú ra sa'ání nda'í ñaá, ta ñó'o ra ndo'ó kua'an ra noó ta né'e choon? ⁷ Ta, ¿á kō ná'á ta'on ndó ña ta kuíká kúú ra ká'an ndava'a sa'á kuū ndato Jesús, ña kándísa yó?

⁸ Dá chí tá miían ndaa kée ndó choon sa'ándá ley Ndios, dá kían va'a va kée ndó. Chí di'a ká'an tuti iī mií ná: “Ku'u ini ndo sa'á ñayuu xí'ín ndó tát'on kī'o ndó'o ndó xí'ín mií ndó.” ⁹ Tído tá káxi ndó ñayuu, dá kían yá'a ndó kée ndó kuachi, ta tái ndo noo Ndios, chí nī xio kao ndó ley ña. ¹⁰ Ta ndi ndaa mií vá ñayuu kée choon sa'ándá ley Ndios, tído tá nī xio kao na iin choon sa'ándáan, dá kían kándoo na tái kuachi na noo ndidaá choon sa'ándáan. ¹¹ Dá chí di'a kaá Ndios noo ley na: “O sa kée ndó kuachi xí'ín na kō kúú ñadi'í ndo o yíi ndo.” Ta kaá ta'ani na: “O sa ka'ání ndó ndi.” Sa'á ñoó va'ará kō ní kée ndó kuachi xí'ín na kō kúú ñadi'í ndo o yíi ndo, tído nī sa'ání ndó ndi, dá kían noo ndidaá kúú vá ley nī ya'a ndó. ¹² Sa'á ñoó ka'an ndo to'on va'a, ta kee ndó ña va'a, chí nakuíta ndó noo Ndios, ta keyíko na sa'a ndo xí'ín iin ká ley, ña kían nī taó xoo ndó noó kuachi. ¹³ Tá ná kasandaá kuū keyíko Ndios sa'á ñayuu, dá kían koó ña maní koo sa'á na kō ní xī'o ká'ano ini sa'á ñayuu xí'ín ná. Tído ña nī xī'o ká'ano ini sa'á ñayuu xí'ín ná, noón kúú na koo ña maní sa'a tá ná keyíko sa'a ná.

Tá miían ndaa kándéé iní yo Jesús, dá kían kánian kee yó ña va'a

¹⁴ Sa'á ñoó ñani miíi, ¿ndá choon kían ña kaá ndo ña kándéé iní ndo Ndios tá kō kée ndó ña va'a? ¿Á ká'an ndó ña káki ndó sa'á ña kaá ndo kándéé iní ndo ná? ¹⁵ Dá chí tá ió iin ñani ndo, o iin kī'o ndó, ta ná'á ndó ña kámani ña'a kandixi na, xí'ín ña'a keí ná iin iin kuū kuū, ¹⁶ dá kaá ndo xí'ín ná: “Kua'an nó'o ní, ta koo va'a ní, ta kasá'an va'a ní, ta kandixi va'a ní.” Tá kaá ndo dión xí'ín ná, tído kō chíndeé ndó ña xí'ín ña xínno'ó ná, dá kían, ¿ndi kúú ña va'a nī kee ndó xí'ín ná, tá dáá?

¹⁷ Dión ta'ani, tá kaá ndo ña kándéé iní ndo Ndios, ta kō kée ndó ña va'a xí'ín ñayuu xí'ín ndó, dá kían kō chóon ta'on ña kándéé iní ndo ná.

¹⁸ Ndá ndi kuu ió iin káa ndó kaa di'a xí'ín yu'u: “Kándéé iní yo'ó Ndios, tído yu'u kúú ra kée ña va'a.” Tído yu'u kaái xí'ín na ká'an dión: “O kúu ta'on na'a ní ña kándéé iní ní Ndios, chí kō kée ní ña va'a. Tído ña va'a kéei ná'a ña miían ndaa ndisa kándéé iní Ndios.” ¹⁹ Tá kándísa ndó ña iin tó'on diní kúú Ndios, dá kían va'a va kée ndó. Tído kana'á

ndó ña nda ña u'u ta'ani kándisa ña iin tó'on kúú Ndios, ta ndéi ninoan noo ná.

²⁰ O sa kákuu ndó ñayuu xixi. ¿Á kō ná'á ta'on ndó ña tá kō kée ndó ña va'a, dá kían ni iin ña'a kō ndáya'i ña kaá ndo kándéé iní ndo Ndios?

²¹ ¿Á kō ná'á ndó ña ni kandoo va'a tatá sá'ano yo Abraham noo Ndios sa'á ña va'a ni kee na, chí kua'an na doko ná de'e na noo Ndios táto'on ni sa'anda mií ná choon? ²² Ta kana'á ndó ña sa'á ña ni kandeé iní Abraham Ndios, sa'á ñoó ni kee na choon ni sa'anda Ndios noo ná. Ta sa'á ña ni keva'a na choon ni sa'anda Ndios, sa'á ñoó ni xinkoo va'a na noo ña kándéé iní ñaá ná. ²³ Dá ni xinkoo to'on ká'an tuti ii Ndios, chí kaáan ña sa'á ña ni kandeé iní Abraham Ndios, sa'á ñoó ni kandoo vii ná noo ná. Ta ká'an ta'anian ña ni sa kuu na amigo Ndios.

²⁴ Ta kana'á ndó ña kandoo vii ñayuu noo Ndios sa'á ña kée na ña va'a, ta o duú savá'a sa'á ña kándéé óon iní ñaá ná. ²⁵ Ta dión ta'ani ni ndo'o iin ña'a sa naní Rahab, ña sa dikó mií noó taa. ¿Á kō ná'á ta'on ndó ña ni kandoo va'an noo Ndios sa'á ña ni keeán ña va'a, chí ni xi'oán ve'an ni kidi taa ni sa'an ni naní ñoan, ta ni dakí'in ñaá iin ka íchi kua'an ra? Ta ki'o dión, dá ni káki ra. ²⁶ Ta sa ná'á vá yó ña tá koó nío nákaa ini yikí koño iin ñayuu, dá kían kō takí ta'on na. Ki'o dión ta'ani kō takí ña kándéé iní yo Ndios tá kō kée yó ña va'a.

Ná koo ini yo dándáki yó yáa yo

3 ¹ Ñani mií, ná dá'a ni kua'a téi ndo katoó kakuu na dána'a, dá chí sa ná'á ndó ña kua'a cháa ka kuendá kánian naki'o na dána'a noo Ndios o duú dao ka ñayuu. ² Ta ndidaá vá yó yá'a nda'o noo Ndios. Tá ió iin na kō yá'a xí'in to'on ká'an na, dá kían kúú ná iin na ndaa, chí nda ña kini kóni ñi ná kándéé ná dándáki na.

³ Dá chí tá ná chikaa yo kaa yú'u kuéi yo, dá kandeé yó dándáki yó ri, chí kanoo yó ri kua'a noo ká'an mií yó. ⁴ Ta kande'é ta'ani ndó táto'on ki'o ndó'o barco, va'ará ndi ki'o ví ná'ano rá, ta va'ará ndi ki'o ví ndakí tachí chinda'á ña, tído xí'in iin tó'on yíto ló'o tárnee tji rá kándéé iin taa kaó ra rá kua'an ra noo kóni mií rá. ⁵ Ta ki'o dión ta'ani ndó'o yó xí'in yáa yo, chí kían iin ña ló'o, tído chindaa noan kéean ña'a ná'ano nda'o. Chí kían táto'on iin ño'ó ita leé ló'o, dá chí va'ará ndi ki'o ví ká'ano yúku, tído vaá óon kándééán chíno'o ndi'i ñaá. ⁶ Ta yáa yo kúú táto'on iin ño'ó kéi, chí kua'a nda'o ña kini kándééán kéean. Ta kían iin ña nákaa tein yikí koño yo, ta kándééán dáyakoan iin ní yó noo Ndios. Ta nda ni kaki yó nda ni xi'i yo kándééán dátúuán yó. Ta kían táto'on mií nó'o ni kii nda indayá.

⁷ Kándéé vá ñayuu dándáki na ndidaá kirí xíka noño'o, xí'in kirí nárnee induú, xí'in kirí xíka tji noño'o, xí'in kirí nó'o ini takuí. ⁸ Tído ni iin tó'on yó o kándéé dándáki yó yáa yo, chí ña kini nda'o kían, ta o kúu ta'on chituu yóan. Ta daá kuití dár'u'an ñayuu xí'in ndutá deéan.

⁹ Ta xí'ín yáa yo kéká'ano yó Ndios, na kúú tatá yo, ta xí'ín mií ta'anian ndáne'e kini yó ñayuu xi'ín yó, na ni kava'a Ndios táto'on ki'o káa mií ná. ¹⁰ Ta xí'ín yú'u yo ká'an yo ña va'a, ta xí'ín mií ta'ani yú'u yo ká'an kini yó. Ká'in xí'ín ndó, ñani mií, ña ko kánian kee yó dión. ¹¹ ¿Á iin tó'ón vá yáí kána takuíí vidí xí'ín takuíí ova, ká'an ndó? ¹² Ñani mií, ¿á kúu ta'ani xí'o taño'ó aceituna, ká'an ndó? Ta, ¿á kúu ta'ani xí'o yitó uva tiño'ó, ká'an ndó? Ta dión ta'ani o kúu ta'on kana takuíí o'ova noo kána takuíí vidí.

Tá miian ndaa kómí yó ña ndichí ni kii noo Ndios, dá kían ñóchí ví kandeí yó xí'ín dao ka ñani yo

¹³ ¿Á ió iin káa na ndichí, o na ió ñaxintóni tein ndo'ó? Dá kían kánian na'a na ña dión kían xí'ín ña va'a kée na, xí'ín ña nda'í ió ini na. ¹⁴ Tído tá nákaa ña u'u ini ini níno ndo, ta chídáó tá'an mií ndó xí'ín dao ka ñani ndo, dá kían ko kánian chindaya'i ndó mií ndó, ta o sa kétó'ón ndó ña ndaa. ¹⁵ Dá chi o duú noo Ndios ní kixi ña ndichí kómí na kée dión, chi ña ndichí kómí ná kúú ña ndichí ió ñayuu yó'o, xí'ín ña ni ta'i ñaxintóni taa, xí'ín ña ndichí xí'o ña u'u. ¹⁶ Dá chi noo ndéi ñayuu u'u ini, xí'ín noo ndéi na chídáó tá'an mií xí'ín dao ka ñayuu, ñoó kúú noo ió tandó'ó, ta kuá'á nda'o ña'a kini ió noo ndéi na. ¹⁷ Tído ñayuu kómí ña ndichí ni kii noo Ndios, noón kúú na ió vii, ta va'a ndéi na xí'ín iin rá iin na, ta kúú ná ñayuu va'a xí'ín ñayuu xi'ín ná, ta va'a ini na, ta kú'u nda'o ini na sa'a dao ka ñayuu, ta kuá'á nda'o ña va'a kée na, ta ko káxi na ñayuu, ta ko kúú ná ñayuu uu noo. ¹⁸ Sa'a ñoó ndidaá kúú na ndí'i ini ña kandeí va'a xí'ín dao ka ñayuu, noón kúú na xionoo chí'i ña va'a, ta kasandaá na natiin na ña va'a kandeí na xí'ín dao ka ñayuu.

Ná dá'a ni katoó ndo ña kini ió ñayuu yó'o

4 ¹ ¿Ndeí vei ña naá ndo, xí'ín ña ndáne'e tá'an ndó tein mií ndó, ká'an ndó? ¿Á ko ná'á ndó ña vei ña tein ña kini katoó ndo kée ndó, chi ña yó'o kían naá tá'an xí'ín ña va'a nákaa ini ñaxintóni ndo? ² Kóni ndo ña koo ña'a noo ndo, tído ko ní'i ta'on ndoan. Sa'ání ndó ndii, ta u'u kini ini ndo, tído ko kándéé ndó ni'i ndo ña kóni ndo. Naá tá'an ndó, ta ndáne'e tá'an ndó, tído ko kándéé ta'on ndó ni'i ndo ña kóni ndo, chi ko xíka ndoan noo Ndios. ³ Tá xíka ndoan noo ná, ko ní'i ta'on ndó ña, dá chi ko xíka va'a ndoan táto'on ki'o kánian kaka ndoan. Chi xíka ndoan, dá kandeé ndó kee ndó ña kini kóni mií ndó.

⁴ iNdo'ó kúú na kée táto'on kée iin ñá'a xiní xíxi yí xí'ín iin ka taa! Chi, ¿á ko ná'á ta'on ndó ña tá xiní xíxi yó Ndios xí'ín ña kini ió ñayuu yó'o, dá kían nduu yó na xiní u'u tá'an xí'ín Ndios? Ta ndi ndaa na ndí'i cháa ka ini sa'a ña ió ñayuu yó'o o duú sa'a ña'a Ndios, noón kúú na ni nduu na xiní u'u tá'an xí'ín Ndios. ⁵ ¿Á ká'an ndó ña ká'an oon tuti ii Ndios? Dá chi kaáan ña ni xi'o na Espíritu na koo na ini yóo, ta kékuión

nda'o na sa'a yóó ña koni yo ná. ⁶ Tído kua'á ka ña maní kée Ndios xí'á, dá chí di'a ká'an tuti ij ná: “Kò náta'an ini Ndios xiní na ñayuu ió táyíí ini, ta di'a xí'o na ña maní noó ñayuu ió nda'í ini.”

Kenóo ndó mií ndó noo Ndios, dá ná chindaya'i na ndo'ó

⁷ Naki'o ndó mií ndó kaño'o toon ndó tixi ndá'a Ndios. Ta o sa kándía ndó kee ndó ña kóni ña u'u, ta kuino mií váán ko'an noo ndo. ⁸ Ta koo ini ndo nandukú ndó Ndios ndidaá kuu, dá ná kuyati cháá ka na koo na xí'ín ndó. Ta ndo'ó, na kómí kuachi, nduvii ndo ndá'a ndó, dá chí ña kini nda'o kían kée ndó xí'án. Ta ndo'ó, na nákaní uu ini, koo ini ndo nduvii ndo níó ndo. ⁹ Kunda'í ini ndo, ta nda'í kuaki ndó, ta ndei'í ndo sa'á kuachi kée ndó. Ta ña sáki ndo, ndee ndóan ná nduuan ña ndei'í ndo. Ta ña kádií ini ndo, ndee ndóan ná nduuan ña kunda'í ini ndo. ¹⁰ Kenóo ndó mií ndó noo Ndios, na kúú sato'o yo, dá ná chindaya'i na ndo'ó.

Ná dá'a ni chinóo kuachi ndó ñani ndo

¹¹ Ñani miíí, o sa kóo ini ndo ka'an kuachi ndó sa'a iin rá iin ndó. Dá chí tá ká'an kuachi ndó sa'a ñani ndo, ta kényíko ndo sa'a ná, dá kían ká'an kuachi ndó sa'a ley Ndios, ta kényíko ndo sa'án. Tído tá kényíko ndo sa'a ley, dá kían ko kée ndó choon sa'ándáan, di'a kée ndó mií ndó kúú ndó iin na kényíko sa'án. ¹² Iin tó'ón diní vá kúú Ndios, na ni xí'o ley. Ta iin tó'ón mií vá ná kúú na kándéé dáka'ki ñayuu, ta iin tó'ón mií ta'ani na kúú na dándó'o níó yo sa'á kuachi kée yó. Sa'á ñoó, ¿nda'í yoo kúú ndo'ó, ká'an ndó? ¿Ndiva'a yá'a ndó kényíko ndo sa'a ñani ndo?

Ná dá'a ni ka'an táyíí ndó sa'á ña kee ndó taan

¹³ Ta kueídó'o va'a ndo'ó, na ká'an di'a: “Viti o taan ko'on ndu iin ñoo, ta ñoó kandeí ndu iin ní kua'á kechóon ndu, ta naka'án nda'í ndu, dá ni'í ndú kua'á di'ón”, kaá ndo'ó. ¹⁴ Tído ko ná'á ta'on ndó ndí kían ndo'ó ndó taan, dá chí kúú ndó tát'o'on vikó nó'ó náka'ani tóó ví'í, ta kúú ndáñó'ó ni'ini vaan. ¹⁵ Sa'á ñoó va'a kaan di'a kánian ka'an ndo: “Tá kóni sato'o yo Ndios, dá kataki ndu cháá ka, dá kee ndu ña yó'o o ña káa.” ¹⁶ Tído di'a ká'an táyíí ndó sa'á ña kúryíí ndó, ta sa'á ña kúryíí ndó, sa'á ñoó kée ndó ña kini. ¹⁷ Dá chí na ná'á ndí kían kúú ña va'a kánian kee na, ta ko kée na ña, na yó'o kúú na yá'a kée kuachi noo Ndios.

Di'a ndo'o na kuiká sa'á ña kini kée na

5 ¹ Kueídó'o va'a ndo'ó, na kúú na kuiká viti. Ndei'í ndo, ta kayu'ú kó'ó ndó, chí vei ña kían ndo'o naní níó ndo. ² Dá chí ndidaá kúú ña kuiká kómí ndó ni tei'í vaan. Ta ndidaá kúú dá'on ndo ni ku'u tikidi. ³ Ta ndidaá kúú di'ón oro xí'ín di'ón plata kómí ndó ni nana daye'e ña,

ta daye'e yó'o ná'a kuachi sa'a ndo, chi ko ní kéchóon va'a ndóan. Ta dánaáan ndo'ó táto'on chíñó'o ño'ó kéj iin ña'a, chi ni ketutí ndó ña kuiká tein kuu noo ndí'i yó'o. ⁴ Ta vití'ón ndé'i kuachi ta kéchóon noñó'o ndo sa'a ya'i ra, chi xí'in ña maña ndo ko ní chíya'i ndó ra. Ta mií sato'o yo Ndios, na kándéé kée ndidaá kúu ña'a, ni seídó'o ña ndé'i kuachi ra sa'a ndo. ⁵ Va'a nda'o ni sa ndei ndó ñayuu yó'o, ni sa komí ndó ndidaá kúu ña va'a ni katoó ndo, ta ni nda'a ndo táto'on ki'o nda'a iin chee kakuu koño, chi viti ni kasandaá kuu kuu ndo. ⁶ Ta dátai kuachi ndó ñayuu ndaa, ta sa'ání ndo ná, ta ni iin ña'a ko kée ná chindeé ná mií ná.

Kandita ndaa ndo nani ndáti ndó nandió koo Jesús kasaa na

⁷ Ta viti, ñani mií, koo ini ndo kandati kueé ndo nda ná nandió koo tuku sato'o yo Jesús kasaa na. Kande'é ndó táto'on ki'o kée iin ta xíti, ndáti kueé ra dákée ra ña ni xiti ra, ta ndáti kueé ra dai noo, ta ndáti kueé ra dai noo ndí'i, dá dákée ra. ⁸ Dión ta'ani kandati kueé ndo, ta kandita ndaa ndo, dá chi sa yati ñó'ó vá nandió koo tuku sato'o yo Jesús kasaa na.

⁹ Ñani mií, o sa ká'an kuachi sa'a sátá'an ndó, dá kían ná o dándó'o Ndios nío ndo. Dá chi sa ni kuyati nda'o kuu kasaa Ndios, na keyíko sa'a yo. ¹⁰ Sa'a ñoó, ñani mií, koo ini ndo kee ndó táto'on ki'o ni sa kee na sa kuu profeta, na sa kasto'on xí'in ñayuu to'on ni ni'i ná noo sato'o yo Ndios. Chi va'ará ni sa ndo'o nío ná, tído ni sa ndati kueé na nda ni ya'a tandó'ó na. ¹¹ Ndiká'an ndi kúu ví na xí'o ndeé ini tá ndó'o na tandó'ó, kaá yo. Chi sa ná'a vá yó ña ni xi'o ndeé nda'o ini Job tá ni ndo'o na tandó'ó. Sa'a ñoó ndato nda'o ni nachindeé ñaá sato'o yo Ndios, dá chi kúu ná iin Ndios va'a nda'o ini, ta kú'u nda'o ini na sa'a yo.

¹² Ta viti, ñani mií, ná ko'in ka'in iin to'on ndaya'i cháa ka xí'in ndó. O sa koo ini ndo nachina'á ndó Ndios tá kua'an ndo ki'o ndó to'on ndó noo iin ka ñayuu, ta o sa kaá ndo: “Ná'a induú”, o: “Ná'a noñó'o yó'o”, ta o sa ká'an ndo ña ná'a dao ka ña'a. Sa'a ñoó tá ká'an ndo “Jaán”, ta dión ná kakian. Ta rá ká'an ndo “Koó”, ta dión ná kakian, dá kían ná dá'a ni kakomí ndó kuachi noo Ndios sa'a ña ká'an ndo dión.

Kaka ndo ña maní noo Ndios sa'a iin rá iin ndó

¹³ ¿Á ió iin na ndó'o nío tein mií ndó xaán? Dá kían kánian kaka na ña maní noo Ndios. ¿Á ió iin na kadii ini tein mií ndó xaán? Dá kían kánian kata na yaa keká'ano na Ndios. ¹⁴ ¿Á ió iin na kú'u tein mií ndó xaán? Dá kían nakana ndó na sá'ano dákuá'a xí'in ndó, dá ná kaka na ña maní noo Ndios sa'a na kú'u ñoó, ta ná chikodó ná sití diní ná xí'in kuu sato'o yo Jesús. ¹⁵ Dá chi tá kándéé ká'ano ini yo Jesús tá xíka yo ña maní noo ná, dá kían nduva'a va na kú'u, ta ndakoo na kee sato'o yo Jesús. Tá ni ya'a na kú'u ñoó ni kee na kuachi, ta kúu ku'u ká'ano va ini

Ndios sa'á kuachi na. ¹⁶ Na'ò ndò kuachi ndó noo iin rá iin ndó, ta kaka ndò ña maní noo Ndios sa'á iin rá iin ndó, dá nduva'a ndó kee Ndios. Dá chí kua'á nda'o ña va'a kúu tá xíka iin na ndíta ndaa xí'ín Ndios ña maní noo ná. ¹⁷ Profeta Elías nì sa kuu iin taa táto'on kí'o kúu míi yó. Ta nì xika na xí'ín ndino'o ini na noo Ndios ña ná o kóon dai. Ta kúu onì kua'á dao kò ní kóon rá noño'o yó'o. ¹⁸ Tá nì ndi'i, dá nì xika tuku na noo Ndios ña koon dai, ta kúu nì kasá'á kóon tuku rá. Dá nì kasá'á kána tuku ña'a noño'o yó'o.

¹⁹ Ñani miíi, tá ió iin káa ndo'ó nì kuxoo kua'an noo ña ndaa kándísa yó, ta ió iin ka ndò nì kandeé nì nandíó né'e tuku na noo ña ndaa, ²⁰ dá kían kana'á ndó ña sa'á ña nì kandeé ndó nì dandíko ini ndò ná noo kúu íchi kini kua'an na, sa'á ñoó nì kandeé ndó nì dakáki ndó na, chí o kuú ta'on na noo Ndios. Ta kúu kua'á nda'o kuachi na ndoo sa'á ña nì kee ndó dión.